

天主實義

天主實義下卷

耶穌會中人 利瑪竇述 燕貽堂較梓

第五篇辯排輪廻六道戒殺生之謬說而揭齊素

正志

中士曰論人類有三般一曰人之在世謂生而非由前跡則死而無遺後跡矣一曰夫有前後與今三世也則吾所獲福禍於今世皆由前世所爲善惡吾所將逢於後世吉凶皆係今世所行正邪也今尊教曰人有今世之暫寄以定後世之永居則謂吾暫處此

世特當修德行善令後世常享之而以此爲行道路
以彼爲至本家以此如立功以彼如受賞焉夫後世
之論是矣前世之論將亦有從來乎西士曰古者吾
西域有士名曰閉他臥刺其豪傑過人而質樸有所
未盡常痛細民爲惡無忌則乘已聞名爲奇論以禁
之爲言曰行不善者必來世復生有報或產艱難貧
賤之家或變禽獸之類暴虐者變爲虎豹驕傲者變
爲獅子淫色者變爲犬豕貪得者變成牛驢偷盜者
變作狐狸豺狼鷹鷂等物苟有罪惡變必相應君子

斷之曰其意美其爲言不免玷缺也沮惡有正道奚
用棄正而從枉乎旣沒之後門人少嗣其詞者彼時
此語忽漏國外以及身毒釋氏圖立新門承此輪廻
加之六道百端誑言輯書謂經數年之後漢人至其
國而傳之中國此其來歷殊無真傳可信實理可倚
身毒微地也未班上國無文禮之教無德行之風諸
國之史未之爲有無豈足以示普天之下哉中士曰
覩所傳坤輿萬國全圖上應天度毫髮無差况又達
自歐邏巴躬入中華所言佛氏之國聞見必真其國

之陋如彼也世人誤讀佛書信其淨土甚有願蚤死以復生彼國者良可笑矣吾中國人不習遠遊異域故其事恒未詳審雖然壤雖褊人雖陋苟所言之合理從之無傷西士曰夫輪迴之說其逆理者不勝數也茲惟舉四五大端一曰假如人魂遷往他身復生世界或爲別人或爲禽獸必不失其本性之靈當能記念前身所爲然吾絕無能記焉并無聞人有能記之者焉則無前世明甚中士曰佛老之書所載能記者甚多則固有記之者西士曰魔鬼欲誑人而從其

類故附人及獸身詒云爲某家子述某家事以徵其
謬則有之記之者必佛老之徒或佛教入中國之後
耳萬方萬類生死衆多古今所同何爲自佛氏而外
異邦異門雖齊聖廣淵可記千卷萬句而不克記前
世之一事乎人善忘奚至忘其父母弃忘已之姓名
獨其佛老之子弟以及畜類得以記而述之乎夫謹
談以欺市井或有順之者在英俊之士辟雍庠序之
間當論萬理之有無不笑且譏之鮮矣中士曰釋言
人魂在禽獸之體本依前靈但其體不相稱故泥不

能達西士曰在他人之身則本體相稱矣亦何不能
記前世之事乎吾昔已明釋人魂之爲神也夫神者
行其本情不賴于身則雖在禽獸亦可以用本性之
靈何不能達之有若果天主設此輪迴美醜之變必
以勸善而懲惡也設吾弗明記前世所爲善惡何以
驗今世所值吉凶果由前世因而勸乎懲乎則輪迴
竟何益焉二曰當上帝最初生人以及禽獸未必定
以有罪之人變之禽獸亦各賦之本類魂耳使今之
禽獸有人魂則今之禽獸魂與古之禽獸魂異當必

今之靈而古之蠢也然吾未聞有異也則今之魂與古者等也三曰明道之士皆論魂有三品下品曰生魂此只扶所賦者生活長大是爲草木之魂中品曰覺魂此能扶所賦者生活長大而又使之以耳目視聽以口鼻啖喫以肢體覺物情是爲禽獸之魂上品曰靈魂此兼生魂覺魂能扶植長大及覺物情而又俾所賦者能推論事物明辨理義是爲人類之魂若令禽獸之魂與人魂一則是魂特有二品不亦紊天下之通論乎凡物非徒以貌像定本性乃惟以魂定

之始有本魂然後爲本性有此本性然後定於此類
既定此類然後生此貌故性異同由魂異同焉類異
同由性異同焉貌異同由類異同焉鳥獸之貌既異
乎人則類性魂豈不皆異乎人之格物窮理無他路
焉以其表而徵其內觀其現而達其隱故吾欲知草
本之何魂視其徒長大而無知覺則驗其內特有生
魂矣欲知鳥獸之何魂視其徒知覺而不克論理則
驗其特有覺魂矣欲知人類之何魂視其獨能論萬
物之理明其獨有靈魂矣理如是明也而佛氏云禽

獸魂與人魂同靈傷理甚矣吾常聞殉佛有謬未嘗
聞從理有誤也四曰人之體態奇俊與禽獸不同則
其魂亦異譬匠人欲成椅卓必須用木欲成利器必
須用鐵器物各異則所用之資亦異旣知人之體態
不同禽獸則人之魂又安能與禽獸相同哉故知釋
氏所云人之靈魂或託於別人之身或入於禽獸之
體而回生於世間誠誑詞矣夫人自己之魂只合乎
自己之身烏能以自己之魂而合乎他人之身哉又
况乎異類之身哉亦猶刀只合乎刀之鞘劍只合乎

劍之鞘安能以刀合劍鞘耶五曰夫云人魂變獸枋
無他據惟疑其前世淫行曾效其獸天主當從而罰
之俾後世爲此獸耳然此非刑也順其欲孰謂之刑
乎奸人之情生平滅已秉彘以肆行其所積內惡而
尚只痛其具人面貌若有防碍使聞後世將改其形
容而憑已流恣詎不大快如暴虐者常習殘殺豈不
欲身着利爪鋸牙爲虎爲狼晝夜以血污口乎倨傲
者習于欺人不識遜讓豈不樂長大其形生爲獅子
爲衆獸之王乎賊盜者以偷人財貨度活何憂化爲

狐狸稟百巧媚以盡其情乎此等輩非但不以變獸
爲刑乃反以爲恩矣天主至公至明其爲刑必不如
是也如曰自人之貴類入獸之賤類卽謂之刑吾意
爲惡之人却不自以生居人類爲貴大抵不理人道
而肆其獸情所羞者具此人面耳已今得脫其人面
而雜於獸醜無恥無忌甚得志也故輪迴之謊言蕩
詞於沮惡勸善無益而反有損也六曰彼言戒殺生
者恐我所屠牛馬卽是父母後身不忍殺之耳果疑
于此則何忍驅牛耕畝或駕之車乎何忍羈馬而

乘之路乎吾意弑其親與勞苦之於耕田罪無大異也弑其親與恒加之以鞭而鞭辱之於市朝又等也然農事不可廢畜用不可免則何疑于戒殺之說而云人能變禽獸不可信矣中士曰夫人魂能爲禽獸者誠誑語也以欺無知小民耳君子何以信吾所騎馬爲吾父母兄弟親戚或君或師朋友乎信之而忍爲之亂人倫信之而不爲之是又廢畜養而必使不用於世人無所容手足矣故其說不可信也然若但言輪迴之後復爲他人乃皆同類亦似無傷西士曰

謂人魂能化禽獸信其說則畜用廢謂人魂能化他人身信其說將使夫婚姻之禮與夫使令之役皆有窒碍難行者焉何者爾所娶女子誰知其非爾先化之母或後身作異姓之女者乎誰知爾所役僕所置責小人非或兄弟親戚君師朋友後身乎此又非大亂人倫者乎總之人既不能變爲鳥獸則亦不能變化他人理甚著明也中士曰前言人魂不滅是往者俱在也有疑使無輪迴以銷變之宇內豈能容此多魂哉西士曰疑此者弗識天地之廣濶者也則意者

易克也又弗通神之性態者也以爲其有克所也形
者在所故能克于所神無形則何以滿其所乎一粒
之大而萬神宅焉豈惟往者將來靈魂並容不碍也
豈用因是而爲輪迴妄論哉中士曰輪迴之說自二
氏出吾儒亦少信之然彼戒殺生者若近於仁天主
爲慈之宗何爲弗與西士曰設人果變爲禽獸君子
固戒殺小物如殺人比彼雖殺貌有異均是人也但
因信此誕說朔望齋素以戒殺生亦自不通譬有人
日日殺人而食其肉且復歸依仁慈而曰朔望我不

殺人不食其肉但以餘目殺而食之可謂戒哉其心
忍恣殺于二十八日彼二日之戒何能增何能減其
惡之盍乎夫吾旣明證無變禽獸之理則弄著無殺
生之戒也試觀天主生是天地及是萬物無一非生
之以爲人用者夫日月星辰麗天以我照也照萬色
以我看也生萬物以遂我用也五色悅我目五音娛
我耳諸味諸香之彙以甘我口鼻百端輒煖之物以
安逸我四肢百端之藥材以醫療我疾病外養我身
內調我心故我當常感天主尊恩而時謹用之鳥獸

或有毛羽皮革可爲裘履或有寶牙角殼可制奇器
或有妙藥好治病疾或有美味能育吾老幼吾奚不
取而使之哉借使天主不許人宰芻豢而付之美味
豈非徒付之乎豈非誘人犯令而陷溺之於罪乎且
自古及今萬國聖賢咸殺生食葷而不以此爲悔亦
不以此爲違戒亦豈宜罪聖賢以地獄而嘉與二三
持齋無德之輩躋之天堂乎此無乃非達者之言歟
中士曰世界之物多有無益乎人且害之者如毒虫
蛇虎狼等所言天主教生萬物一一以爲人用似非然

西士曰物體幽眇其用廣繁故凡人或有所未能盡達而反以見害此自人才之蔽耳人固有二曰外人所謂身體也曰內人所謂魂神也比此二者則內人爲尊毒蟲虎狼險外人而寧內人卒可謂益於人焉夫傷身體之物俗稱惡物而其警我畏天主之怒使知以天以水以火以虫皆能責人之犯命者吾于是不得不戒懼以時祈乞其助時念望之豈非內正人者之大資乎且天主悲惜小人心全在於地惟泥於今世而不知惺望天堂及後世高上事情是以燕

置彼醜毒于本界欲拯拔之焉况天主初立世界俾
天下萬物或養生或利用皆以供事我輩原不爲害
自我輩忤逆上帝物始亦忤逆我則此害非天主初
旨乃我自招之耳中士曰天主生生者必愛其生而
不欲其死則戒殺生順合其尊旨矣西士曰草木亦
稟生魂均爲生類爾曰取菜以茹折薪以焚而殘忍
其命必將曰天主生此菜薪以憑人用耳則用而無
妨我亦曰天主生彼鳥獸以隨我使耳則殺而使之
以養人命何傷乎仁之範惟言無欲人加諸我我勿

欲加諸人耳不言勿欲加諸禽獸者且天下之法律
但禁殺人無制殺鳥獸者夫鳥獸草不與財貨並行
惟用之有節足矣故孟軻示世主以數罟不可入洿
池而斧斤以時入山林非不用也中士曰草木雖爲
生類然而無血無知覺是與禽獸異者也故釋氏戕
之而無容悲西士曰謂草木爲無血乎是僅知紅色
者之爲血而不知白者綠者之未始非血也夫天下
形生者必以養而所以得養者津液存焉則凡津液
之流貫皆血矣何必紅者試觀水族中如蝦如鱗多

無紅血而釋氏弗茹蔬菜中亦有紅液而釋氏茹之
不禁則何其重愛禽獸之血而輕棄草木之血乎且
不殺知覺之物以其能痛也已我誠不欲其痛寧獨
不殺卽勞之役之將有所不可凡牛之耕野馬之驂
乘未免終身之患豈伊不長有痛乎較殺之之痛止
在一時者又遠矣况禁殺牲反有害於牲蓋禽獸爲
人用故人飼畜之飼畜之而後禽獸益蕃多也如不
得之以爲用人豈畜之乎朝捐不急之官家黜無能
之僕而况畜類乎西虜懼食豕而一國無豕天下而

皆西虜則豕之種類滅矣故愛之而反以害之殺之而反以生之是禁殺牲者大有損于牧牲之道矣中士曰如此則齋素無所用耶西士曰因戒殺生而用齋素此殆小不忍也然齋有三志識此三志滋切滋崇矣夫世固少有今日賢而先日不爲不肖者也少有今日順道而昔日未嘗違厥道者也厥道也者天主銘之於心而命聖賢布之板冊犯之者必得罪于上帝所從得罪者益尊則罪益重君子雖已遷善豈恬然于往所得罪乎曩者所爲不善人或赦弗追究

而已時記之愧之悔之設無深悔吾所既失於前烏
可望免之于後也况夫今之爲善君子不自滿足將
必以闕已之短爲離婁以視已之長爲盲瞽焉所責
備諸已者精且厚人雖稱以俊傑而已愧忤如不置
也所省疚於心者密且詳人雖調其備美而已勤敬
如猶虧也詎徒謙于言乎詎徒悔于心乎深自羞耻
奚堪歡樂則貶食減食除其殺味而惟取其淡素凡
一身之用自擇粗陋自苦自責以贖已之舊惡及其
新罪晨夜惶惶稽顙于天主臺下哀憫涕淚與洗已

乃敢妄自居聖而誇無過妄自饒已而須他人審判其非也乎所以躬自懲詰不少姑恕或者天主惻恤而免宥之不再鞫也此齋素正志之說一也夫德之爲業人類本業也聞其說無不悅而願急事焉但被私欲所發者先已篡人心而擅主之反相壓難憤激攻伐大抵平生所行悉供其役耳是以凡有所事弗因義之所令惟因欲之所樂睹其面容則人觀其行於禽何擇乎蓋私欲之樂乃義之敵塞智慮而蒙理竅與德無交世界之瘟病莫凶乎此矣他病之害止

于軀殼欲之毒藥通吾心髓而大殘元性也若以義
之仇對攝一心之專權理不幾亡而厥德尚有地可
居乎嗚呼私欲之樂微賤也遽過也而屢貽長悔于
心以卑短之樂售永久之憂非智之謂也然私欲惟
自本身藉力逞其勇猛故遏其私欲當先約其本身
之氣學道者願寡欲而豐養身比方願滅火而益加
薪可得哉君子欲飲食特所以存命小人欲存命特
所以飲食夫誠有志於道怒視是身若寇讐然不獲
已而姑畜之且何云不獲已歟吾雖元未嘗爲身而

生但無身又不得而生則服食爲腹饑之藥服飲爲
口渴之藥耳誰有取藥而不惟以其病之所要爲度
數焉者性之所嗜寡而易營多品之味佳而難遂盡
人欲者之所圖而以其所養人頗反而賊人則謂飲
食殛人多乎刀兵可也今未論所害于身只指所傷
乎心僕後過健恐忤抗其主也血氣過強定傾危乎
志也志危即五欲肆其惡而色慾尤甚豐味不恣腹
色慾何從發淡飲薄食色氣潛餒一身既理約諸欲
自服理矣此齋素正志之說二也且本世者苦世也

非索翫之世矣天主寘我於是促促焉務脩其道之不暇非以奉悅此肌膚也然吾無能竟辭諸樂也無清樂必求淫者無正樂必尋邪者得彼則失此故君子常自習其心快以道德之事不令含憂困而有望乎外又時簡畧腠膚之樂恐其透于心而侵奪其本樂焉夫德行之樂乃靈魂之本樂也吾以茲與天神侔矣飲食之娛乃身之竊愉也吾以茲與禽獸同矣吾益增德行之娛於心益近至天神矣益減飲食之娛於身益遯離禽獸矣吁可不慎哉仁義令人心明

五味令人口爽積善之樂甚即有大利乎心而于身無害也豐膳之樂繁而身心俱見深傷矣腹充飽以殺饌必垂下而墜已志於污賤如此則安能抽其心於塵垢而起高曠之慮乎哉惡者觀人盤樂而已無之斯嫌妬之矣善者視之則反憐恤之而讓已曰彼殉污賤事而猶好之如此懇求之如此吾既志於上乘而未能聊味之未能略備之且寧如此懈惰而不勉乎哉世人之灾無他也心病而不知德之佳味耳覺其味則膏粱可輕矣謂自得其樂也此二味者更

迭出入於人心而不可同住者也欲內此必先出彼也古昔有貢我西國二獵犬者皆良種也王以一寄國中顯臣家以其一寄郊外農舍並使畜之已壯而王出田獵試焉二犬齊縱入囿農舍之所畜犬身臞體輕走躡禽跡疾趨獲禽無筭顯家所養犬雖潔肥容美足觀也然但習肉食充腸安佚四肢不能馳驟則見禽不顧而忽遇路傍腐骨卽就而齧之齧畢不動矣從獵者知其原同一母而出則異之王曰此不足恠豈惟獸哉人亦莫不如是也皆係於養耳矣養

之以佚翫飫飽必無所進于善也養之以煩勞儉約
必不悞若所望矣若曰凡人習於膳美厚膳見禮義
之事不暇惟悅焉而就食耳習於精理微義遇飲食
之玩亦不暇必思焉而殉理義耳此齋素正志之說
三也夫齋有多端予徧延天下多國已備聞之或不
拘殮味但終晝不食迄星夜雜食衆味此謂時齋或
不論時殮惟戒諸葷而隨時茹素此謂味齋或不擇
味時特一日間食一殮耳此謂殮齋或殮時味皆有
所拘只午時茹素一頓而惟禁止肉食屬陽者其海

味屬陰者不戒此謂公齋或禁止火食終身山穴專以野草根度生茲歐邏巴山中甚衆此謂私齋也然夫數等之所齋總歸責屈本已要在視其人視其身何如耳富貴膏粱減取其常亦可謂齋彼賤家民時習粗糲不可以爲齋也不則丐子可謂至齋也又須量本身之力何如有衰病者未免時以滋味養身也有行役者勞其四肢不容久餓故天主教制老者六旬已上穉者二旬已下身病者乳子者勞力爲僕夫者皆不在齋程之內夫戒口之齋非齋也乃齋之

末節也。究齋之意，總爲私欲之遏，不可不敦，不盡矣。是以持齋而捨敬，戒譬如藏璞而弛其玉，無知也。中士曰：善哉！法語真。齋之正旨也。吾俗行齋者，非緣貧乏而持齋，以餬口，必其偷取善名，而陰以欺人者也。當衆而致齋，幽獨而無人，酒色忿怒，不義貨財，讒賢毀善，無所不有。嗚呼！人目不能逃，能瞞上帝乎？幸領高諭，尚願盡其問。西士曰：道邃且廣，不憚問，不可約守。詳問，卽誠意之效也。何傷夫！

第六篇釋解意不可滅并論死後必有天堂地獄

之賞罰以報世人所爲善惡

中士曰承教一則崇上帝爲萬尊之至尊一則貴人品爲至尊之次但以天堂地獄爲言恐未或天主之教也夫因趣利避害之故爲善禁惡是乃善利惡害非善善惡正志也吾古聖賢教世弗言利惟言仁義耳君子爲善無意况有利害之意耶西士曰吾先哲子之末語然後答子之本問彼滅意之說固異端之詞非儒人之本論也儒者以誠意爲正心脩身齊家治國平天下之根基何能無意乎且曰臺無堅基不

克起儒學無誠意不能立矣設自正心至平天下凡
所行事皆不得有意則奚論其意誠乎虛乎譬有琴
於市使吾不宜奏何以售之何拘其古琴今琴歟且
意非有體之類乃心之用耳用方爲意卽有邪正若
令君子畢竟無意不知何時誠乎大學言齊治均乎
必以意誠爲要不誠則無物矣意於心如視於目目
不可卻視則心不可除意也君子所謂無意者虛意
私意邪意也如云滅意是不達儒者之學不知善惡
之原也善惡德慝俱由意之正邪無意則無善惡無

君子小人之判矣中士曰毋意毋善毋惡世儒固有其說西士曰此學欲人爲土石者耳謂上帝宗義有是哉若上帝無意無善亦將等之乎土石也謂之理學悲哉悲哉昔老莊亦有勿爲勿意勿辯之語然已所著經書其從者所爲註解意固欲易天下而僉從此一端夫著書獨非爲乎意易天下獨非意乎旣不可辯是非又何辯辯是非者乎辯天下名理獨非辯乎則旣已自相戾矣而欲師萬世也難哉吾觀世人爲事如射焉中的則謂善不中則爲惡天主者自然

中于的者也有至純之善無纖芥之惡其德至也吾
儕則有中有不中矣其所脩之德有限故德有不到
卽行事有所不中而善惡叅焉爲善禁惡縱有意猶
恐不及况無意乎其餘無意之物如金石草木類然
後無德無惡無善無惡如以無意無善惡爲道是金
石草木之而後成其道耳中士曰老莊之徒只欲全
其天年故屏意棄善惡以絕心之累也二帝三王周
公孔子皆苦心盡力脩德於己以施及於民非止于
至善不敢息誰有務全身滅意逍遙以充其百歲之

數者哉縱充其百歲之壽亦不能及一龜一朽樹之
壽也而徒以加二三旬之暫於此穢身竟何濟哉然
二氏無足詆所言德慝善惡俱由意其詳何如聞夫
順理者即爲善而稱之德行犯理者即爲惡而稱之
不才則顧行事如何於意似無相屬西士曰理易解
也凡世物既有其意又有能縱止其意者然後有德
有慝有善有惡焉意者心之發也金石草木無心則
無意故鎔錐傷人後讐者不折鎔錐飄瓦損人首伎
心者不怨飄瓦然鎔錐截斷無與其功者瓦蔽風雨

民無酬謝所爲無心無意是以無德無愿無善無惡
而無可以賞罰之若禽獸者可謂有禽獸之心與意
矣但無靈心以辯可否隨所感觸任意速發不能以
理爲之節制其所爲是禮非禮不但不得已且亦不
自知有何善惡之可論乎是以天下諸邦所制法律
無有刑禽獸之愿賞禽獸之德者惟人不然行事在
外理心在內是非當否嘗能知覺兼能縱止雖有獸
心之欲若能理心爲主獸心豈能違我主心之命故
吾發意從理卽爲德行君子天主祐之吾溺意獸心

卽爲犯罪小人天主且棄之矣嬰兒擊母無以咎之
其未有以檢已意也及其壯而能識可否則何待于
擊稍逆其親卽加不孝之罪矣昔有二弓士一之山
野見叢有伏者如虎慮將傷人因射之偶誤中人一
登樹林恍惚傍視行動如人亦射刺之而寔乃鹿也
彼前一人果殺人者然而意在射虎斷當褒後一人
雖殺野鹿而意在刺人斷當貶奚由焉由意之美醜
異也則意爲善惡之原明著矣中士曰子爲養親行
盜其意善矣而不免于法何如西士曰吾西國有公

論曰善者成乎全惡者成于一試言其故人旣爲盜雖其餘行悉義但呼爲惡不可稱善所謂西子蒙不索則人皆掩鼻而過之譬如水甕週圍厚堅惟底有一罅水從此漏此甕決爲無用碎瓦惡之爲情甚毒也捨已之財普濟貧乏以竊善聲而得非所得之位所爲雖當其意實枉則其事盡爲不直蓋醜意汚其善行也子爲親竊人財物其事旣惡何有善意吾言正意爲爲善之本惟謂行吾正勿行吾邪偷盜之事固邪也雖襲之以義意不爲正矣爲纖微之不善可

以抹天下萬民猶且不可爲矧以育二三口乎爲善
正意惟行當行之事故意益高則善益精若意益陋
則善益粗是故意宜養宜誠也何滅之有哉中士曰
聖人之教縱不滅意而其意不在功效只在脩德故
勸善而指德之美不指賞沮惡而言惡之罪不言罰
西士曰聖人之教在經傳其勸善必以賞其沮惡必
以懲矣舜典曰象以典刑流宥五刑又曰三載考績
三考黜以幽明庶績咸熙分北三苗臯陶謨曰天念
有德五服五章哉夫討有罪五刑五用哉益稷謨曰

帝曰迪朕德時乃功惟敘臯陶方祗厥敘方施象刑
惟明盤庚曰無有遠邇用罪伐厥死用德彰厥善邦
之臧惟汝衆邦之不臧惟予一人佚罰又曰乃有不
吉不迪顛越不恭暫遇奸宄我乃劓殄滅之無遺育
無俾易種于茲新邑泰誓武王曰爾衆士其尚迪果
毅以登乃辟功多有厚賞不迪有顯戮又曰爾所弗
勗其于爾躬有戮康誥曰乃其速由文王作罰刑茲
無赦多士曰爾克敬天惟畀矜爾爾不克敬爾不啻
不有爾土予亦致天之罰于爾躬多方又曰爾乃惟

逸惟頗大遠王命則惟爾多方探天之威我則致天之罰離逖爾土此二帝三代之語皆言賞罰固皆併利害言之中士曰春秋者孔聖之親筆言是非不言利害也西士曰俗之利害有三等一曰身之利害此以肢體寧壽爲利以危夭爲害二曰財貨之利害此以廣田畜充金貝爲利以減耗失之爲害三曰名聲之利害此以顯名休譽爲利以譴斥毀污爲害也春秋存其一而不及其二者也然世俗大槩重名聲之利害而輕身財之損益故謂春秋成而亂臣賊子懼

亂臣賊子奚懼焉非懼惡名之爲害不已乎孟軻首以仁義爲題厥後每會時君勸行仁政猶以不王者未之有也爲結語王天下顧非利哉人孰不悅利于朋友利于親戚如利不可經心則何以欲歸之友親乎仁之方曰不欲諸已勿加諸人旣不宜望利以爲已猶必當廣利以爲人以是知利無所傷于德也利所以不可言者乃其僞乃其悖義者耳易曰利者義之和也又曰利用安身以崇德也論利之大雖至王天下猶爲利之微况戰國之主雖行仁政未必能王

雖使能王天下一君耳不取之此不得乎彼夫世之利也如是耳矣吾所指來世之利也至大也至實也而無相碍縱盡人得之莫相奪也以此爲利王欲利其國大夫欲利其家士庶欲利其身上下爭先天下方安方治矣重來世之益者必輕現世之利輕現世之利而好犯上爭奪弑父弑君未之聞也使民皆望後世之利爲政何有中士曰嘗聞之何必勞神慮未來惟管今日眼前事此是實語何論後世西士曰陋哉使犬彘能言也無異此矣西域上古有一人立

教專以快樂無憂爲務彼時亦有從之者自題其墓
碑曰汝今當飲食懽戲死後無樂兮諸儒稱其門爲
猪窰門也詎貴邦有暗契之者夫無遠慮必有近患
猷之不遠詩人所刺吾視人愈智其思愈遯人愈愚
其思愈通凡民之類豈可不預防未來先謀未逮者
乎農夫耕稼於春圖秋之穡松樹百年始結子而有
藝之所謂圃翁植樹爾玄孫攀其子者行旅者周沿
江湖與老之安居鄉土百工勤習其業期獲所賴士
畧卅勤苦博學欲後輔國匡君夫均不以眼前今日

之事爲急者也不肖子敗其先業虞公喪國夏桀殷紂失天下此非不慮悠遠徒管今日眼前事者乎中士曰然但吾在今世則所慮雖遠止在本世耳死後之事似迂也西士曰仲尼作春秋其孫著中庸厥慮俱在萬世之後夫慮爲他人而諸君子不以爲迂吾慮爲已惟及二世而子以爲迂乎童子圖旣老之事未知厥能至壯否而莫之謂遠也吾圖死後之事或卽詰朝之事而子以爲遠乎子之婚也奚冀得子孫中士曰以有治喪葬墳墓祭祀之事也西士曰然是

亦死後之事矣吾旣死所留者二不能朽者精神也
腐者骸體我以不能朽者爲切子尚以速腐者爲
可謂我迂乎中士曰行善以致現世之利遠現世之
害君子且非之來世之利害又何足論歟西士曰來
世之利害甚真大非今世之可比也吾今所見者利
害之影耳故今世之事或凶或吉俱不足言也吾聞
師之喻曰人生世間如俳優在戲場所爲俗業如搬
演雜劇諸帝王宰官士人奴隸后妃婢媵皆一時粧
飾之耳則其所衣衣非其衣所逢利害不及其躬搬

演旣畢解去粧飾漫然不復相關故俳優不以分位
高卑長短爲憂喜惟扮所承脚色雖乞丐亦真切爲
之以中主人之意耳已蓋分位在他充位在我吾曹
在于茲世雖百歲之久較之後世萬禩之無窮烏足
以當冬之一日乎所得財物假貸爲用非我爲之真
主何徒以增而悅以減而愁不論君子小人咸赤身
空出赤身空返臨終而去雖遺金千笈積在庫內不
帶一毫何必以是爲留意哉今世僞事已終卽後世
之真情起矣而後乃各取其所宜之貴賤也若以今

世利害爲真何異乎蠢民看戲以粧帝王者爲真貴人以粧奴隸者爲真下人平意之爲情精粗不齊負教世之責者孰先布其麓而後不聞其精必旣切琢而後磋磨矣需醫者惟病者非謂瘳者也需吾教者惟小人耳已君子固自知之故教宜曲就小人之意也孔子至衛見民衆欲先富而後教之詎不知教爲滋重乎但小民由利而後可迪乎義耳凡行善者有正意三狀下曰因登天堂免地獄之意中曰因報答所重蒙天主恩德之意上曰因翕順天主聖旨之意

也教之所望乎學者在其成就耳不獲已而先指其
端焉民溺于利久矣不以利迪之害駭之莫之引領
也然上意至則下意無所容而去矣如縫錦繡之衣
必用絲線但無鐵鍼線不能入然而其鍼一進即過
所庸留於衣裳者絲線耳已吾欲引人歸德若但舉
其德之美夫人已昧於私欲何以覺之乎言不入其
心即不願聽而去惟先怵惕之以地獄之苦誘導之
以天堂之樂將心傾耳欲聽而漸就乎善善惡惡之
成旨成者至則缺者化去而獨其成就恒存焉故曰

惡者惡惡因懼刑也善者惡惡因愛德也往時敝邑
出一名聖神今人稱爲拂卽祭斯穀首立一會其規
戒精密以廉爲尚今從者有數萬友皆成德之士也
初有親友一友名曰如泥伯陸會中無與比者其學
豁然日增無息有一邪鬼憎妬欲沮之僞化天神旁
射輝光夜見於聖神私居曰天神諭爾如尼伯陸德
誠隆也雖然終不得躋天堂必墮地獄天主嚴命已
定不可易也言訖弗見拂卽祭斯穀驚秘不敢洩而
心深痛惜每見如尼伯陸不覺涕淚如尼伯陸屢見

而疑之已齋宿赴師座問曰某也日孜孜守戒奉敬
天主幸在憫教邇日以來覺先生目有異也何以數
涕淚于弟子拂卽祭斯穀初不肯露再三懇請盡述
向所見聞如尼伯陸怡然曰是何足憂乎天主主宰
人物惟其旨所置之上天下地吾儕無不奉焉吾所
爲敬愛之者非爲天堂地獄爲其至尊至善自當敬
自當愛耳今雖棄我何敢毫髮懈惰惟益加敬慎事
之恐在地獄時卽欲奉事而不可及矣拂卽祭斯穀
觀其容也聽其語也恍然悟而嘆曰悞哉前者所聞

有學道如斯而應受地獄殃者乎天主必躋爾天堂
矣夫此天堂地獄其在成德之士少借此意以取樂
而免苦也多以修其仁義而已矣何者天堂非他乃
古今仁義之人所聚光明之宇地獄亦非他乃古今
罪惡之人所流穢污之域升天堂者已安其心乎善
不能易也其落地獄者已定其心乎惡不克改也吾
願定心於德勿移于不善吾願長近仁義之君子求
離罪惡之小人誰云以利害分志而在正道之外乎
儒者攻天堂地獄之說是未察此理耳已中士曰茲

與浮屠勸世輪迴變禽獸之說何殊西士曰遠矣彼用虛無者僞詞吾用實有者至理彼言輪迴往生止于言利吾言天堂地獄利害明揭利以引人于義豈無辯乎且夫賢者修德雖無天堂地獄不敢自己况實有之中士曰善惡有報但云必在本世或不於本身必於子孫耳不必言天堂地獄西士曰本世之報微矣不足以充人心之欲又不滿誠德之功不足現上帝賞善之力量也公相之位極重之酬矣若以償德之價萬不償一矣天下固無可以償德之價者也

修德者雖不望報上帝之尊豈有不報之盡備者乎
王者酬臣之功賞以三公足矣上帝之酬而於是乎
止乎人之短于量也如是夫世之仁者不仁者皆屢
有無嗣者其善惡何如報也我自爲我子孫自爲子
孫夫我所親行善惡盡以還之子孫其可爲公乎且
問天主旣能報人善惡何有能報其子孫而不能報
及其躬苟能報及其躬何以捨此而遠俟其子孫乎
且其子孫又有子孫之善惡何以爲報亦將俟其子
孫之子孫以酬之歟爾爲善子孫爲惡則將舉爾所

當享之賞而盡加諸其爲惡之身乎可謂義乎爾爲惡子孫爲善則將舉爾所當受之刑而盡置諸其爲善之躬乎可爲仁乎非但王者卽霸者之法罪不及胄天主捨其本身而惟胄是報耶更善惡之報於他人之身紊宇內之恒理而俾民疑上帝之仁義無所益於爲政不如各任其報耳中士曰先生曾見有天堂地獄而決曰有西士曰吾子以見無天堂地獄而決曰無何不記前所云乎胄者不必以肉眼所見之事方信其有理之所見者直于肉眼未耳目之覺或

常有差理之所是必無謬也中士曰願聞此理西士
曰一曰凡物類各有本性所向必至是而定止焉得
此則無復他望矣人類亦必有止然觀人之常情未
有以本世之事爲足者則其心之所止不在本世明
也不在本世非在後世天堂歟蓋人心之所向惟在
全福衆福備處乃謂天堂是以人情未迄于是未免
有冀焉全福之內含壽無疆人世之壽雖欲信天地
人三皇及楚之冥靈上古大椿其壽終有界限則現
世悉有缺也所謂世間無全福彼善於此則有之至

于天堂則止弗可尚人性于是止耳二曰人之所願
乃知無窮之真乃好無量之好今之世也真有窮好
有量矣則於是不得盡其性矣夫性是天主所賦豈
徒然賦之必將充之亦必於來世盡充之三曰德于
此無價也雖舉天下萬國而市之未足以還德之所
值苟不以天堂報之則有德者不得其報稱矣得罪
上帝其罪不勝重雖以天下之極刑誅之不消其咎
苟不以地獄求未殃之則有罪者不得其報稱矣天
主掌握天下人所行而德罪無報稱未之有也四曰

上帝報應無私善者必賞惡者必罰如今世之人亦有爲惡而富貴安樂爲善而貧賤苦難者上帝固待其人之旣死然後取其善者之魂而天堂福之審其惡者之魂而地獄刑之不然何以明至公至審乎中士曰善惡之報亦有現世何如西士曰設令善惡之報咸待于來世則愚人不知來世之應者何以驗天上之有主者將益放恣無忌故犯彛者時遇饑荒之灾以懲其前而戒其後順理者時蒙吉福之降以酬于往而勸其來也然天主至公無不盡賞之善無不

盡罰之惡故終身爲善不易其心則應登天堂享太
福樂而賞之終身爲惡至死不悛則宜墮地獄受重
禍災而罰之其有爲善而貧賤者或因爲善之中有
小過惡焉故上帝以是現報之至於歿後旣無所欠
則入全福之域永享常樂矣亦有爲惡而富貴者乃
行惡之際並有微善存焉故上帝以是償之及其死
後旣無可舉則陷深陰之獄永受罪苦矣夫宇宙內
外災祥由天主歟由命歟天主令外固無他命也中
士曰儒者以聖人爲宗聖人以經傳示教遍察吾經

傳通無天堂地獄之說豈聖人有未達此理乎何以
隱而未著西士曰聖人傳教視世之能載故有數傳
不盡者又或有面語而未悉錄于冊者或已錄而後
失者或後頑史不信因削去之者况事物之文時有
換易不可以無其文卽云無其事也今儒之謬攻古
書不可勝言焉急乎文緩乎意故今之文雖隆今之
行實衰詩曰文王在上於昭于天文王陟降在帝左
右又曰世有哲王三后在天召誥曰天旣遐終大邦
殷之命茲殷多先哲王在天夫在上在天在帝左右

非天堂之謂其何歟中士曰察此經語古之聖人已
信死後固有樂地爲善者所居矣然地獄之說絕無
可徵于經者西士曰有天堂自有地獄二者不能相
無其理一耳如真文王殷王周公在天堂上則桀紂
盜跖必在地獄下矣行異則受不同理之常固不容
疑也緣此人之臨終滋賢者則滋舒泰而畧無駭色
焉滋不肖則滋逼迫而以死爲痛苦不幸之極焉若
以經書之未載爲非真且悞甚矣西庠論之訣曰正
書可證其有不可證其無吾西國古經載昔天主關

開天地卽生一男名曰亞黨一女名曰阨襪是爲世
人之祖而不書伏羲神農二帝吾以此觀之可證當
時果有亞黨阨襪二人然而不可證其後之無伏羲
神農二帝也若自中國之書觀之可證古有伏羲神
農于中國而不可證無亞黨阨襪二祖也不然禹蹟
不寫大西諸國可謂天下無大西諸國哉故儒書雖
未明辯天堂地獄之理然不宜因而不信也中士曰
善者登天堂惡者墮地獄設有不善不惡之輩死後
當往何處西士曰善惡無間非善卽惡非惡卽善惟

善惡之中有巨微之別耳善惡譬若生死人不生則死未死則生固無弗生弗死者也中士曰使有人先爲善後變而爲惡有先爲惡後改而爲善茲二人身後何如西士曰天主乃萬靈之父限本世之界以勸吾儕于德必以瀕死之候爲定故平生爲善須臾變心向惡而死便爲犯人則受地獄常末之殃其前善惟末減耳平生爲惡今日改心歸善而死則天主必扶而宥之免前罪而授天堂萬年永常受福也中士曰如此則平生之惡無報焉西士曰天主經云人改

惡之後或自悔之深或以苦勞本身自懲于以求天主之宥天主必且赦之而死後即可昇天也倘悔不深自苦不及前罪則地獄之內另有一處以寘此等人或受數日數年之殃以補在世不滿之罪報也補之盡則亦躡天其理如此中士曰心悟此理之是第先賢之書云何必信天堂地獄如有天堂君子必登之如有地獄小人必入之吾當爲君子則已此語庶幾得之西士曰此語固失之何以知其然乎有天堂君子登之必也但弗信天堂地獄之理決非君子中

士曰何也西士曰且問乎子不信有上帝其君子人
歟否歟中士曰否詩曰維此文王小心翼翼昭事上
帝孰謂君子而弗信上帝者西士曰不信上帝至仁
至公其君子人歟否歟中士曰否上帝爲仁之原也
萬物公主也孰謂君子而弗信其至仁至公者耶西
士曰仁者爲能愛人能惡人苟上帝不予善人升天
堂何足云能愛人不迨惡人于地獄何足云能惡人
乎夫世之賞罰大畧未能盡公若不待身後以天堂
地獄還各行之當然則不免乎私焉弗信此烏信上

帝爲仁爲公哉且夫天堂地獄之報中華佛老二氏
信之儒之智者亦從之太東太西諸大邦無疑之天
主聖經載之吾前者揭明理而顯之則拘逆者必非
君子也中士曰如此則固信之矣然尚顧聞其說西
士曰難言也天主經中特舉其槩不詳傳之然夫地
獄之刑於今世之殃畧近吾可借而比焉彼天堂之
快樂何能言乎夫本世之患有息有終地獄之苦無
間無窮聖賢論地獄分其苦勞二般或責其內中或
責其表外若凍熱之不勝臭穢之難當饑渴之至極

是外患也若戰慄視厲鬼魔威恨妬瞻天神福樂愧
悔無及憶已前行乃內禍也雖然罪人所傷痛莫深
乎所失之巨福也故常哀哭自悔曰悲哉吾生前爲
淫樂之微失無窮之福而溺于此萬苦之聚谷乎今
欲改過免此而已遲欲死而畢命以脫此而不得蓋
此非改過之時天主公法所使以刑具苦痛其人不
令毀滅其體而以悠久受殃也夫不欲死後落地獄
全在生時思省思其苦思其勞思則戒戒則不爲陷
溺之事而地獄可免焉設地獄之嚴刑不足以動爾

心天堂之福當必望之經曰天堂之樂天主所備以
待仁人者目所未見耳所未聞人心所未及忖度者
也從是可徵其處爲衆吉所歸諸堯之所遠焉夫欲
度天堂光景且當縱目觀茲天地萬物現在奇麗之
景多有令人歎息無已者而卽復推思此乃上帝設
之以爲人民鳥獸共用之具爲善與作惡同寓之所
猶且制作成就如此若其獨爲善人造作全福之處
更當何如哉必也常爲暄春無寒暑之迭累常見光
明無暮夜之屢更其人常快樂無憂怒哀哭之苦常

舒泰無危險韶華之容常駐不變歲年來往大壽無
減常生不滅周旋左右于上帝世俗之人烏能達之
烏能言釋之哉夫衆福吉之溶泉聖神所常嗜所常
食嗜而未始乏食而未始饜也此其所享不等僉由
生時所爲之善功有多寡而享福隨之無有胥憎何
者各滿其量也譬長身者長衣短身者短衣長短各
得其所欲何憎之有衆善爲侶和順親愛俯視地獄
之苦豈不更增快樂也乎白者比黑而彌白光者比
暗而彌光也天主正教以此頒訓于世而吾輩拘於

月恒觀不明未見之理比如囚婦懷胎產子暗獄
其子長而未知日月之光山水人物之嘉只以大
燭爲日小燭爲月以獄內人物爲齊整無以尚也則
不覺獄中之苦殆以爲樂不思出矣若其母語之以
日月之光輝貴顯之粧飾天地境界之文章廣大數
萬里高億萬丈而後知容光之細桎梏之苦囹圄之
窄穢則不肯復安爲家矣乃始晝夜圖脫其手足之
桎梏而出尋朋友親戚之樂矣世人不信天堂地獄
或疑或謂豈不悲哉中士曰悲哉世人不爲二氏所

誕則蕩蕩如無牧之群以苦世爲樂地天堂耳茲語也慈母之訓也吾已知有本家尚願習回家之路西士曰正路茅塞邪路及闢固有不知其路而妄爲引者真似僞也僞近真也不可錯認也向萬福而卒至萬苦臯彼行路慎之哉

第七篇論人性本善而迷天主門士正學

中士曰先辱示以天主爲兆民尊父則知宜慕愛次示人類靈魂身後不滅則知本世暫寄不可爲重復聞且有天堂爲善者昇焉居彼已定心修德以事上

帝與神人爲侶况有地獄居彼已定心不改惡以受
刑殃致萬世不可脫也茲欲詢事天主正道夫吾儒
之學以率性爲修道設使性善則率之無錯若或非
盡善性固不足恃也奈何西士曰吾觀儒書嘗論性
情而未見定論之訣故一門之中恒出異說知事而
不知已本知之亦非知也欲知人性其本善耶先論
何謂性何謂善惡夫性也者非他乃各物類之本體
耳曰各物類也則同類同性異類異性曰本也則凡
在別類理中即非茲類本性曰體也則凡不在其物

之體界內亦非性也但物有自立者而性亦爲自立
有依賴者而性兼爲依賴可愛可欲謂善可惡可疾
謂惡也通此義者可以論人性之善否矣西儒說人
云是乃生覺者能推論理也曰生以別于金石曰覺
以異于草木曰能推論理以殊乎鳥獸曰推論不直
達又以分之乎鬼神鬼神者徹盡物理如照如
視不待推論人也者以其前推明其後以其顯驗其
隱以其既曉及其所未曉也故曰能推論理者立人
於本類而別其體於他物乃所謂人性也仁義禮智

在推理之後也理也乃依賴之品不得爲人性也古
有岐人性之善否誰有疑理爲有弗善者乎孟子曰
人性與牛犬性不同解者曰人得性之正禽獸得性
之偏也理則無二無偏是古之賢者固不同性於理
矣釋此庶可荅子所問人性善否歟若論厥性之體
及情均爲天主所化生而以理爲主則俱可愛可欲
而本善無惡矣至論其用機又由乎我我或有可愛
或有可惡所行異則用之善惡無定焉所爲情也夫
性之所發若無病疾必自聽命于理無有違節即無

不善然情也者性之足也時著偏疾者也故不當壹
隨其欲不察于理之所指也身無病時口之所啖甜
者甜之苦者苦之乍遇疾變以甜爲苦以苦爲甜者
有焉性情之已病而接物之際悞感而拂于理其所
愛惡其所是非者鮮得其正鮮合其真者然本性自
善此亦無碍于稱之爲善盖其能推論理則良能常
存可以認本病而復治療之中士曰貴邦定善之理
曰可愛定惡之理曰可惡是一說固盡善惡之情敝
國之士有曰出善乃善出惡乃惡亦是一端之理若

吾性既善此惡自何來乎西士曰吾以性爲能行善惡固不可謂性自本有惡矣惡非實物乃無善之謂如死非他乃無生之謂耳如士師能死罪人詎其有死在已乎苟世人者生而不能不爲善從何處可稱成善乎天下無無意于爲善而可以爲善也吾能無強我爲善而自往爲之方可謂爲善之君子天主賦人此性能行二者所以厚人類也其能取捨此善非但增爲善之功尤俾其功爲我功焉故曰天主所以生我非用我所以善我乃用我此之謂也卽如設正

鵠非使射者失之亦猶惡情於世非以使人爲之彼金石鳥獸之性不能爲善惡不如人性能之以建其功也其功非功名之功德行之真功也人之性情雖本善不可因而謂世人之悉善人也惟有德之人乃爲善人德加于善其用也在本善性體之上焉中士曰性本必有德無德何爲善所謂君子亦復其初也西士曰設謂善者惟復其初則人皆生而聖人也而何謂有生而知之有學而知之之別乎如謂德非自我新知而但返其所已有已失之大犯罪今復之不

足以爲大功則固須認二善之品矣性之善爲良善
德之善爲習善夫良善者天主原化性命之德而我
無功焉我所謂功止在自習積德之善也孩提之童
愛親鳥獸亦愛之常人不仁不仁乍見孺子將
入於井即皆怵惕此皆良善耳鳥獸與不仁者何德
之有乎見義而即行之乃爲德耳彼或有所未能或
有所未暇視義無以成德也故謂人心者始生如素
簡無所書也又如艷貌女人其美則可愛然皆其父
母之遺德也不足以見其本德之巧若視其衣錦尚

綱而後其德可知也茲乃女子本德矣吾性質雖妍如無德以飾之何足譽乎吾西國學者謂德乃神性之寶服以久習義念義行生也謂服則可著可脫而得之于忻然爲善之念所謂聖賢者也不善者反是但德與罪皆無形之服也而惟無形之心即吾所謂神者衣之耳中士曰論性與德古今衆矣如闢其衷根則茲始聞焉夫爲非義猶以汙穢染本性爲義猶以文錦彰之故德修而性彌美焉此誠君子修己之功然又有勉于外事而不復反本者西士曰惜哉世

俗之盡日周望殫心方以疊僞珍悅肉眼而不肯累
啟心目以視千萬世之文彩內神之真實也宜其逐
日操心困苦而臨終之候哀痛懼慄如畜獸被牽於
屠矣天主生我世間使我獨勤事于德業常自得無
窮之福不煩外借焉而我自棄之反以行萬物之役
趨百危險誰咎乎誰咎乎夫人非願爲尊富惟願恒
得所欲耳得所欲之路無他惟勿重其所求得之
不在我者焉我固有真我也我自害之心之害乃真
害也人以形神兩端相結成人然神之精超于形故

智者以神爲真已以形爲藏已之器古有賢臣亞那
爲篡國者所傷泰然曰爾傷亞那之器非能傷亞那
者也此所謂達人者也中士曰人亦誰不知違義之
自殲縱德者之自有大吉盛福而不須外具也然而
務德者世世更稀其德之路難曉乎抑難進乎西士
曰俱難也進尤甚焉知此道而不行則倍其愆且減
其知比于食者而不能化其所食則充而無養反傷
其身力行焉踐其所知即增闢其才光益厚其心力
以行其餘試之則覺其然焉中士曰吾中州士古者

學聖教而爲聖今久非見聖入則竊疑今之學非聖人之學茲願詳示學術西士曰嘗竊視群書論學各具已私若已測悟公學吾何不聽命而復有稱述西庠學乎顧取捨之在于耳夫學之謂非但專效先覺行動語錄謂之學亦有自己領悟之學有視察天地萬物而推習人事之學故曰智者不患乏書冊無傳師天地萬物盡我師盡我參也學之爲字其義廣矣正邪大小利鈍均該焉彼邪學固非子之所問其勢利及無益之習君子不以營心焉吾所論學惟內也

爲已也約之以一言謂成已也世之弊非無學也是
乃徒習夫寧無習之方乃竟無補乎行吾儕本體之
神非徒爲精貴又爲形之本主故神修卽形修神成
卽形無不成矣是以君子之本業特在于神貴邦所
謂無形之心也有形之身得耳目口鼻四肢五司以
交覺于物無形之神有三司以接通之曰司記含司
明悟司愛欲焉凡吾視聞啖覺卽其像由身之五門
竅以進達于神而神以司記者受之如藏之倉庫不
令忘矣後吾欲明通一物卽以司明者取其物之在

司記者像而委曲折衷其體協其性情之真于理當
否其善也吾以司愛者愛之欲之其惡也吾以司愛
者惡之恨之蓋司明者達是又達非司愛者司善善
又司惡惡者也三司已成吾無事不成矣又其司愛
司明者已成其司記者自成矣故講學只論其二爾
已司明者尚真司愛者尚好是以吾所達愈直其真
愈廣濶則司明者愈成充吾所愛益好其好益深厚
則司愛益成就也若司明不得直者司愛不得好者
則二司者俱失其養而神乃病餒司明之大功在義

司愛之大本在仁故君子以仁義爲重焉二者相須
一不可廢然惟司明者明仁之善而後司愛者愛而
存之司愛者愛義之德而後司明者察而求之但仁
也者又爲義之至精仁盛則司明者滋明故君子之
學又以仁爲主焉仁尊德也德之爲學不以強奪不
以久藏毀而殺施之與人而更長茂在高益珍所謂
德在百姓爲銀在牧者爲金在君爲貝也嘗聞智者
爲事必先立一主意而後圖其善具以獲之如旅人
先定所往之域而後尋詢去路也終之意固在其始

也夫學道亦要識其向往者吾果爲何者而學乎不然則貿貿而往自不知其所求或學特以知識此乃徒學或以售知此乃賤利或以使人知此乃罔勤或以誨人乃所爲慈或以淑已乃所爲智故吾曰學之上志惟此成已以合天主之聖旨耳所謂由此而歸此者也中士曰如是則其成已爲天主也非爲已也則毋柰外學也西士曰烏有成已而非爲已者乎其爲天主也正其所以成也仲尼說仁惟曰愛人而儒者不以爲外學也余曰仁也者乃愛天主與夫愛人

者崇其宗而不遺其枝派何以謂外乎人之中雖
親若父母比于天主者猶爲外焉况天主常在物內
自不當外意益高者學益尊如學者之意止於一己
何高之有至于爲天主其尊乃不可加矣孰以爲賤
乎聖學在吾性內天主銘之人心原不能壞貴邦儒
經所謂明德明命是也但是明爲私欲蔽揜以致昏
瞶不以聖賢躬親喻世人豈能覺恐以私欲悞認明
德愈悖正學耳然此學之貴全在力行而近人妄當
之以講論豈知善學之驗在行德不在言德乎然其

講亦不可遺也講學也者溫故而習新達蘊而解
奮已而勸人博學而篤信者也善之道無窮故學爲
善者與身同終焉身在不可一日不學凡曰已至其
必未起也凡曰吾已不欲進於善卽是退復於惡也
中士曰此皆真語敢問下手工夫西士曰吾素譬此
工如圃然先緒地拔其野草除其瓦石注其泥水於
溝壑而後藝嘉種也學者先去惡而後能致善所謂
有所不爲方能有所爲焉未學之始習心橫肆其惡根
固深透乎心抽使去之可不睚眦乎勇者克已之謂

也童年者蚤卽于學其工如一得工如十無前習之累故也古有一善教者子弟從之必問曾從他師否以從他師者爲其已貽曩時之悞必倍其將誠之儀一因改易其前悞一因教之以知新也旣已知學矣尚迷乎色慾則何以建於身毅尚驕傲自滿欺人則何以進乎謙德尚惑非義之財物不返其主則何以秉廉尚溺乎榮顯功名則何以超于道德尚將怨天尤人則何以立於仁義桓白泓以醢醢不能斟之鬱鬱矣知已之惡者見善之倪而易入于德路者也歟

剪諸惡之根而興已於善不若守敝會規例逐日再
次省察凡已半日間所思所言所行善惡有善者自
勸繼之有惡者自懲絕之久用此功雖無師保之責
亦不患有太過然勤修之至恒習見天主於心目儼
如對越至尊不離于心枉念自不萌起不須他功其
外四肢莫之禁而自不適於非義矣故改惡之要惟
在深悔悔其昔所已犯自誓弗敢再蹈心之旣沐德
之寶服可衣焉夫德之品衆矣不能具論吾今爲子
惟揭其綱則仁其要焉得其綱則餘者隨之故易云

元者善之長君子體仁足以長人夫仁之說可約而
以二言窮之曰愛天主爲天主無以尚而爲天主者
愛人如已也行斯二者百行全備矣然二亦一而已
篤愛一人則并愛其所愛者矣天主愛人吾真愛天
主者有不愛人者乎此仁之德所以爲尊其尊非他
乃因上帝借令天主所以成我者由他外物又或求
得之而不能得則尚有歉然皆由我內關特在一愛
云耳孰曰吾不能愛乎天主諸善之聚化育我施生
我使我爲人不爲禽虫且賜之以作德之性吾愛天

主卽天主亦寵荅之何適不祥乎人心之司愛向于
善則其善彌大司愛者亦彌充天主之善無限畧則
吾德可長無定畧矣則夫能充滿我情性惟天主者
也然于善有未通則必不能愛故知寸貝之價當百
則愛之如百知拱璧之價當千則愛之如千是故愛
之機在明達而欲致力以廣仁先須竭心以通天主
之事理乃識從其教也中士曰天主事理目不得見
所信者人所言所錄耳信人之知惟恍惚之知何能
決所向徃西士曰人有形者也交于人道者非信人

不可況交乎無形者耶今余不欲揭他遠事也子孝嚴親無所不至然子何以知孝惟信人之言知其乃生已之父也非人言自何以知之乎子又忠於君雖捐命無悔其爲君亦只信經書所傳耳臣孰自知其爲已君乎則吾所信有實據不可謂不真切明曉足以爲仁之基也况夫天主事非一夫之言天主親貽正經諸國之聖賢傳之天下之英俊僉從之信之固不爲妄何恍惚之有中士曰如此則信之無容疑矣但仁道之大比諸天地無不覆載今日一愛已爾似

平太監西士曰血氣之愛尚爲群情之主矧神理之
愛乎試如逐財之人以富爲好以貧爲醜則其愛
也如未得則欲之如可得則望之如不可得則喪志
旣得之則喜樂也若更有奪其所取者則惡之慮爲
人之所奪則避之如可勝則發勇爭之如不可勝則
懼之一旦失其所愛則哀之如奪我愛者強而難敵
則又或思禦之或欲復之而忿怒也此十一情者特
自一愛財所發總之有所愛則心搖其身體豈能靜
漠無所爲乎故愛財者必逝四極交易以殖貨愛色

者必朝暮動費以備嬖妾愛功名者終身經歷百險以逞其計謀愛爵祿者攻苦文武之業以通其幹才天下萬事皆由愛作而天主之愛獨可已乎愛天主者固奉敬之必顯其功德揚其聲教傳其聖道關彼異端者然愛天主之效莫誠乎愛人也所謂仁者愛人不愛人何以驗其誠敬上帝歟愛人非虛愛必將渠饑則食之渴則飲之無衣則衣之無屋則舍之憂患則恤之慰之愚蒙則誨之罪過則諫之侮我則恕之旣死則葬之而爲代祈上帝且死生不敢忘之故

昔大西有問于聖人者曰行何事則可以至善與曰
愛天主而任汝行也聖人之意乃從此哲引者固不
差路矣中士曰司愛者用于善人可耳人不皆善其
惡者必不可愛况厚愛乎若論他人其無大損若論
在五倫之間雖不善者我中國亦愛之故父爲瞽瞍
弟爲象舜猶愛友焉西士曰俗言仁之爲愛但謂愛
者可相答之物耳故愛鳥獸金石非仁也然或有愛
之而反以仇則我可不愛之乎夫仁之理惟在愛其
人之得善之矣非愛得其善與美而爲已有也譬如

愛醴酒非愛其酒之有美愛其酒之好味可爲我嘗也則非可謂仁于酒矣愛己之子則愛其有善即有富貴安逸才學德行此乃謂仁愛其子若爾愛爾子惟爲愛其奉己此非愛子也惟愛自己也何謂之仁乎惡者固不可愛但惡之中亦有可取之善則無絕不可愛之人仁者愛天主故因爲天主而愛己愛人知爲天主則知人人可愛何特愛善者乎愛人之善緣在天主之善非在人之善故雖惡者亦可用吾之仁非愛其惡惟愛其惡者之或可以改惡而化善也

况雙親兄弟君長與我有恩有倫之相繫吾宜報之
有天主誠令慕愛之吾宜守之又非他人等乎則雖
其不善豈容斷愛耶人有愛父母不爲天主者茲乃
善情非成仁之德也雖虎之子爲豹均愛親矣故有
志於天主之旨則博愛于人以及天下萬物不須徒
膠之爲一體耳中士曰世之誦讀經書者徒視其文
而聞其旨其曩者嘗誦詩云維此文王小心翼翼昭
事上帝聿懷多福厥德不回今聞仁之玄論歸于天
主而始知詩人之旨也志事上帝卽德無缺矣然仁

既惟愛天主則天主必眷愛仁人何須焚香禮拜誦
經作功乎吾檢慎于日用各合其義斯已焉西士曰
天主賜我形神兩備我宜兼用二者以事之天主繁
育鳥獸昭布萬像而其竟莫有知所酬報者獨人類
能建殿堂設禮祭祀拜誦經以申感謝何者天主之
愛人甚矣大父之慈恐人以外物蔽其內仁則命聖
人作此外儀以啟吾內德而常存省之俾吾日日仰
目禱祈其恩旣得之則讚揚其盛而感之不忘且以
是明我本來了無毫髮之非上賜而因以增廣吾仁

日令後世彌厚享賞也天主之經無他只是欽崇上帝恩德而讚美之或祈恕宥昔者所犯罪惡或乞恩祐以貽危難以避咎愆以進于至德故數數誦之者必益敦信此道愈闢心明以達學術之隱也又恐汚邪妄想侵滑人心因而渙散于是天主又教之以禮不拘男女咸日誦經拜叩以閑其邪夫吾天主所授工夫匪佛老空無寂寞之教乃悉以誠實引心于仁道之妙故初使掃去心惡次乃光其闇惑卒至令之于天主之旨俾之化爲一心而與天神無異用之必

有其驗但今不暇詳鮮耳吾竊視貴邦儒者病正在此第言明德之修而不知人意易疲不能自勉而修又不知瞻仰天帝以祈慈父之佑成德者所以鮮見中士曰拜佛像念其經全無益乎西士曰奚啻無益乎大害正道惟此異端愈祭拜尊崇罪愈重矣一家止有一長二之則罪一國惟得一君二之則罪乾坤亦特由一主二之豈非宇宙間重大罪犯乎儒者欲罷二氏教于中國而今乃建二宗之寺觀拜其像比如欲枯槁惡樹而厚培其本根必反榮焉中士曰天

主爲宇內至尊無疑也然天下萬國九州之廣或天主委此等佛祖神仙菩薩保固各方如天子宅中而差官布政于九州百郡或者貴方別有神祖耳西土曰此語本失而似得不細察則誤信之矣天主者非若地主但居一方不遣人分任卽不能兼治他方者也上帝知能無限無外爲而成無所不在所御九天萬國體用造化比吾示堂猶易奚待彼流人代司之哉且理無二是設上帝之教是則他教非矣設他教是則上帝之教非矣朝廷設官分職咸奉一君無異

禮樂無異法令彼二氏教自不同况可謂天主教同乎
彼教不尊上帝惟尊一已耳已昧于大原大本焉所
宣誨諭大非天主之制具可謂自任豈天主任之乎
天主經曰方之方之有蒼羊皮而內爲豺狼極猛者
善樹生善菓惡樹生惡果視其所行即知何人謂此
輩耳凡經半句不真決非天主之經也天主者豈能
欺人傳其僞理乎異端僞經虛詞誕言難以勝數悉
非由天主出者如曰日輪夜藏須彌山之背曰天下
有四大部州皆浮海中半見半沒曰阿圖以左右手

掩日月爲日月之蝕此乃天文地理之事身毒國所
所未達吾西儒笑之而不屑辯焉吾今試指釋氏所
論人道之事三四處其失不可勝窮也曰四生六道
人魂輪廻又曰殺生者靈魂不昇天堂或歸天堂亦
復廻生世界以及地獄充滿之際復得再生于人間
又曰禽獸聽講佛法亦成道果此皆拂理之語第四
五篇已明辯之又言婚姻俱非正道則天主何爲生
男女以傳人類豈不妄乎無婚配佛從何生乎禁殺
生復禁人娶意惟滅人類而讓天下於畜類耳又有

一經名曰大乘妙法蓮花經。囑其後曰：能誦此經者，得到天堂受福。今且以理論之，使有罪大惡極之徒，力能置經誦讀，則得升天受福。若夫脩德行道之人，貧窮困苦，買經不便，亦將墜於地獄。與又曰：呼誦南無阿彌陀佛，不知幾聲，則免前罪而死後乎？吉了無凶禍如此，其易即可自地獄而登天堂乎？豈不亦無益於德而反導世俗以爲惡乎？小人聞而信之，孰不遂私欲，汙本身，侮上帝，亂五倫，以爲臨終念佛者，若干次，可變爲仙佛也？天主刑賞必無如是之失。公失

正者天南無阿彌陀一句有何深妙即可逃重殃而
著厚賞不讚德不祈祐不悔已前罪不述宜守規誡
則從何處立功修行哉世人交友或有一二語誑終
身不敢盡信其言今二氏論大事許多誑謬人尚畢
信其餘何也中士曰佛神諸像何從而起西士曰上
古之時人甚愚直不識天主或見世人畧有威權或
自戀愛已親及其死而立之貌像建之祠宇廟禰以
爲思慕之跡暨其久也人或進香獻紙以祈福佑又
有最惡之人以邪法制服妖怪以此異事自稱佛仙

假布誠術詐爲福祉以駭惑頑俗而使之塑像祀奉此其始耳中士曰非正神何以天主容之不滅之且有焚禱像下或致感應者西士曰有應也亦有不應也則其應非由彼神邪像也人心自靈或有非理常自驚詫已而規其隱者不須外威也又緣人旣爲非則天主弃之不祐故邪神魔鬼潛附彼像之中得以侵迷誑誘以增其愚夫人旣奉邪神至其已死靈魂墜於地獄卒爲魔鬼所役使此乃魔鬼之願也幸得天主不甚許此等邪神發見於人間見亦少以美像

常睹醜惡或一身百臂或三頭六臂或牛頭或龍
等怪類正欲人覺悟知其非天上容貌乃諸魔境惡
相耳而人猶迷惑塑其像而置之金座拜之祀之悲
哉夫前世貴邦三教各撰其一近世不知從何出一
妖怪一身三首名曰三函教庶氓所宜駭避高士所
宜疾擊之而乃倒拜師之豈不愈傷壞人心乎中士
曰曾聞此語然儒者不與也願相與直指其失西士
曰吾且具四五端實理以証其誣一曰三教者或各
真全或各僞缺或一真全而其二僞缺也苟各真全

則專從其一而足何以其二爲乎苟各僞缺則當竟爲卻屏奚以三海蓄之哉使一人習一僞教其誤已甚也况兼三教之僞乎苟惟一真全其二僞缺則惟宜從其一真其僞者何用乎一曰輿論云善者以全成之惡者以一耳如一艷貌婦人但乏鼻人皆醜之吾前明釋二氏之教俱各有病若欲包含爲一不免惡謬矣一曰正教門令入者篤信心一無二若奉三函之教豈不俾心分于三路信心彌薄乎一曰三門由三氏立也孔子無取于老氏之道則立儒門釋氏

不足于道儒之門故又立佛門於中國夫三宗自己
意不相同而二千年之後測度彼三心意強爲之同
不亦誣欺一曰三教者一尚無一尚空一尚誠有焉
天下相離之事莫遠乎虛實有無也借彼能合有與
無虛與實則吾能合水與火方與圓東與西天與地
也而天下無事不可也胡不思每教本戒不同若一
戒殺生一令用牲祭祀則陋三者欲守此固違彼守
而違違而守詎不亂教之極哉於以從三教寧無一
教可從無教可從必別尋正路其從三者自意教爲

有餘而實無一得焉不學上帝正道而殉人夢中說
夢乎夫真維一耳道契於其直故能榮生不得其一
則根透不深根不深則道不定道不定則信不篤不
一不深不篤其學烏能成乎中士曰噫嘻寇者殘人
深夜而起吾儕自救猶弗醒也聞先生之語若霹靂
焉動吾眠而使之覺雖然猶望卒以正道之宗援我
西士曰心旣醒矣眼旣啟矣仰天而祈上祐其時也
夫

第八篇總舉大西俗尚而論其傳道之士所以不

娶之意并釋天主降生西土來由

中土曰貫邦既習天主之教其民必醇樸其風必正
雅願聞所尚西土曰民之用功乎聖教每每不等故
雖云一道亦不能同其所尚然論厥公者吾大西諸
國且可謂以學道本世者也故雖各國之君皆務
存道正傳又立有尊位曰教化皇專以繼天主頒
教諭世爲已職異端邪說不得作于列國之間主教
者之位享三國之地然不婚配故無有襲嗣惟擇賢
而土餘國之君臣皆臣子服之蓋既無私家則惟公

是務旣無子則惟以此民爲子是故迫人於道惟此
殫力窮所不能及則委才全德盛之人代誨牧子列
國焉列國之人每七日一罷市禁止百工不拘男女
尊卑皆聚于聖殿謁禮拜祭以聽談道解經者終日
又有豪士數會其朋友出遊于四方講學勸善間有
敝會以耶穌名爲號其作不久然其三四友者廣聞
信於諸國皆願求之以誘其子弟於真道也中士曰
擇賢以君國布士以訓民尚德之國也美哉風矣又
聞尊教之在會者無私財而以各友之財共焉事無

自專毋聽長者之命焉其少也成已德博已學耳壯
者學成而後及于人以文會以誠約吾中夏講道者
或難之然有終身絕色終不婚配之戒未審何意夫
生類自有之情宜難盡絕上帝之性生生爲本祖考
百千其世傳之及我可卽斷絕乎西士曰絕色一事
果人情所難故天主不布之于誠律強人盡守但令
人自擇願者遵之耳然其事難能大抵可以驗德難
乎精嚴正行凡人旣對于德則路定而不易矣君子
修德不憚劬苦吾方寸之志已立則世上無難事焉

使以難爲爲非義則甚難爲義者也生生者上帝死
死者誰乎二者本一非由二心未開天地千萬世以
前上帝無生一生者生生之性何在乎人心之卑賤
莫測尊極之心矧云咎之哉且人以上帝之心爲心
非但以傳生爲義亦有常生之理夫天下人民總合
言之如一身焉其身之心意惟一耳各肢之所司
甚衆令一身悉爲首腹胡以行動令全身皆爲手足
胡以見聞胡以養生乎比此而論不宜責一國之人
各同一轍若云以此生人又隸司教以主祭祀始爲

全備竊謂婚姻之情固難竟絕上帝之祀又須專潔
二職渾責一身其于敬神之禮必有荒蕪夫人奉事
國君尚有忍尅本身者奉事上帝詎不宜克已慾心
哉古之民寡而德盛而一人可以兼二職今世之患
非在人少乃人衆而德衰耳圖多子而不知教之斯
乃祇增禽獸之群豈所云廣人類者歟有志乎救世
者深悲當世之事制爲敝會規則絕色不娶緩於生
子急於生道以拯援斯世墮溺者爲意其意不更公
乎又傳生之責男與女均今有貞女受聘未嫁而去

卒者守義無二儒者嘉之天子每旌表之彼其棄色而忘傳生者第因守小信於匹夫在家不嫁尚且見褒吾三四友人因奉事上帝欲以便宜遊天下化萬民而未暇一婚乃受貶焉不亦過乎中士曰婚娶者於勸善宣道何傷乎西士曰無相傷也但單身不娶愈靖以成已愈便以及人也吾爲子揭其便處請詳察之以明敝會所爲有所據否一曰娶者以生子爲室家耳旣獲幾子必須養育而以財爲置養之資爲人之父不免有貨殖之心今之父子衆則求財者衆

也求之者衆難以各得其願矣吾以身纏拘於俗情
不能超脫無溺必將以苟且爲華也欲立志責人於
義豈能興起乎夫修德以輕貨財爲首務我方重愛
之何勸爾輕置之哉二曰道德之情至幽至奧人心
未免昏昧色慾之事又恒鈍人聰明焉若爲色之所
役如以小燈藏之厚皮籠內不益矇乎豈能達于道
妙矣絕色者如去心目之塵垢益增光明可以窮道
德之精微也三曰天下大惑維由財色二欲耳以仁
繫憤救世者必以解此二惑爲急醫家以相悖者相

治故熱病用寒藥寒病用燠藥乃能療之茲吾惡富
之害而自擇爲貧者畏色之傷而自擇爲獨夫者處
已若此而後無義之財邪色之欲始有省焉故敝會
友捐已義得之財物以勸人勿干非義之富爲脩道
以卻正色之樂以勸人勿迷于非禮之色也四曰縱
有俊傑才能使其心散而不專乎一則所爲事必不
精克己之功難于克天下自古及今史傳英雄攻天
下而得之者多矣能克己者幾人哉志欲行道于四
海之內非但欲克己已兼欲防遏羣民私欲則其功

用之大易可計乎專之猶恐未精誠宜ハハ之他務而
將要我事少艾而育小兒乎五曰養養馬者遇騏驎
驊騮可一日而馳千里則謹牧以期戰陣之用懼有
劣嫗於色者別之於群不使與牝接焉天主聖教亦
將尋豪傑之人能周徧四方之疆界者以明道禦侮
息異論逆邪說而永存聖教之正也豈欲懷其心以
色樂而不欲培養其果毅以克私慾之習乎故西士
之專心續道甚于專事嗣後者也譬夫歛收五穀萬
石未有盡播之田中以爲穀種者必將擇其一以貢

君以藝稼爲明年之積易獨人間萬子皆罄費之
以產子而無所全留以待他用者耶六曰凡事有人
與鳥獸同者不可甚重焉勞身以求食求食以充饑
充饑以蓄氣蓄氣以敵害敵害以全已性命也咸下
情也人於鳥獸此無殊也若謹慎以殉義殉義以檢
心檢心以修身修身以廣仁廣仁以荅天主恩也此
乃生人切事可以稱上帝之大旨從此觀之則匹配
之情于務道之意孰重乎天下寧無食不寧無道天
下寧無人不寧無教故因道之急可緩婚姻之急

不可緩道也以遵頒天主聖旨雖奔致已身以當之
可也况棄婚乎七曰敝會之趣無他乃欲傳正道於
四方焉耳苟此道於西不能行則遷其友于東於東
猶不行又將徙之於南北奚徒盡身於一境乎醫之
仁者不繫身于一處必周流以濟各處之病方爲博
施婚配之身纏繞一處其本責不越于齊家或迄于
一國而已耳故中國之傳道者未聞其有出遊異國
者夫婦不能相離也吾會三四友聞有可以行道之
域雖在幾萬里之外亦卽往焉無有託家寄妻子之

應則以天主爲父母以世人爲兄弟以天下爲已家
焉其所涵胸中之志如海天然豈一匹夫之諒乎八
目凡此與彼彌似則其性彌近天神了無知色者絕
色者其情邇乎天神矣夫身在地下而比居上天者
以有形者而效無形者此不可謂鄙人庸學也似此
清淨之士有所祈禱于天主或天之旱或妖鬼之慳
也或遇水火灾異之求解也天主大都鑒而聽之不
然上尊何寵之哉然吾此數條理特具以解敝會不
婚之意非以非婚姻者也蓋順理娶也非犯天主誠

也又非謂不娶者皆通神人也設令絕婚屏色而不
惓惓于秉彛之德豈不徒然乎乃中國有辭正色而
就邪斜者去女色而取頑童者此輩之穢汚西鄉君
子弗言恐浼其口雖禽獸之彙亦惟知陰陽交感無
有反悖天性如此者人弗報焉則其犯罪若何吾敎
同會者收全已種不之藝播于田畝而子猶疑其可
否况弃之溝壑者哉中士曰依理之語以服人心強
于利刃也但中國有傳云不孝有三無後爲大者如
何西士曰有解之者云彼一時此一時古者民未衆

當充擴之今人已衆宜姑停焉予曰此非聖人之傳
語乃孟氏也或承悞傳或以釋舜不告而娶之義而
他有托焉禮記一書多非古論議後人集禮便雜記
之于經典貴邦以孔子爲大聖學庸論語孔子論孝
之語極詳何獨其大不孝之戒群弟子及其孫不傳
而至孟氏始著乎孔子以伯夷叔齊爲古之賢人以
比干爲殷三仁之一旣稱三子曰仁曰賢必信其德
皆全而無缺矣然三人咸無後也則孟氏以爲不孝
孔子以爲仁且不相戾乎是故吾謂以無後爲不孝

斷非中國先進之旨使無後果爲不孝則爲人子者
宜旦夕專務生子以續其後不可一日有間豈不誘
人被色累乎如此則舜猶未爲至孝耳益男子二十
以上可以生子舜也三十而娶則二十逮三十匪孝
乎古人三旬已前不婚則其一旬之際皆匪孝乎譬
若有匹夫焉自審無後非孝有後乃孝輒娶數妾老
于其鄉生子至多初無他害可稱可爲孝乎學道之
士平生遠遊異鄉輔君匡國教化兆民爲忠信而不
顧產子此隨前論乃大不孝也然於國家兆民有大

功焉則輿論稱爲大賢孝否在內不在外由義豈由
他乎得子不得子也天主有定命矣有求子者而不
得焉有求孝而不得孝者乎孟氏嘗曰求則得之舍
則失之是求有益於得也求在我也求之有道得之
有命是求無益於得也求在外也以是得嗣無益於
得况爲峻德之效乎大西聖人言不孝之極有三也
陷親於罪惡其上弑親之身其次親財物又其次
也天下萬國通以三者爲不孝之極至中國而後闢
無嗣不孝之罪於三者猶加重焉吾今爲子定孝之

說欲定孝之說先定父子之說凡人在宇內有三父
一謂天主二謂國君三謂家君也逆三父之旨者爲
不孝子矣天下有道三父之旨無相悖蓋下父者命
已子奉事上父者也而爲子者順乎一卽兼孝三焉
天下無道三父之令相反則下父不順其上父而私
子以奉已弗顧其上其爲之子者聽其上命雖犯其
下者不害其爲孝也若從下者逆其上者固大爲不
孝者也國主於我相爲君臣家君於我相爲父子若
使比乎天主之公父乎世人雖君臣父子平爲兄弟

耳焉此倫不可不明矣夫萬國通大西之境界皆稱
爲出聖人之地蓋無世不有聖人焉吾察百世以下
敵土聖人之尊者咸必終身不娶聖人爲世之表豈
天主立之爲表而處已於不義之爲哉彼有不娶而
爲積財貨或爲糊口或爲偷安懈惰其卑賤之流何
足論者若吾三四友一心慕道以事天主救世歸元
且絕諸色之類使其專任鄙見無理可捐誠爲不可
然而群聖以其身先之萬國賢士美之有實理合之
有天主經典奇之亦可姑隨其志否耶以繼後爲急

者惟不知事上帝不安于本命不信有後世者以爲
生世之後已盡滅散無有存者真可謂之無後言今
世奉事上帝而望萬世以後猶悠久常奉事之何患
無後乎吾死而神明全在當益鮮潤所遺虛軀殼子
葬之亦腐朋友葬之亦腐則何擇乎中士曰爲學道
而不婚配誠合義也我大禹當亂世治洪水巡行九
州八年於外三過其門而不入今也當平世士有室
家何傷焉西士曰嗚呼子以是爲平世乎誤矣智者
以爲今時之灾比堯時之灾愈洪也群世人而盲瞽

不之能視焉則其殘不亦深乎古之所謂不祥從外
而來人猶易見而速防其所傷不踰財貨或傷膚皮
今之禍自內突發哲者覺之而難避也況于恒人故
其害莫甚焉如風雷妖恠之擊人不損乎外而侵其
內者也夫化生天地萬物乃大公之父也又時主宰
安養之乃無上其君也世人弗仰弗奉則無父無君
至無忠至無孝也忠孝蔑有尚存何德乎夫以金木
土泥鑄塑不知何人僞像而倡愚氓往拜禱之曰此
乃佛祖此乃三清也且興淫辭奸說以壅塞之使之

泥濘中心而不得歸其宗且以空無爲物之原豈非
空無天主者乎以人類與天主爲同一體非將以土
帝之尊而侔之於卑役者乎恣其誕妄以天主無限
之威靈而等之於土石枯木以其無窮之仁覆爲有
玷缺而寒暑災異憾且尤之侮狎君父一至于此蓋
昭事上帝之學久已陵夷不思小吏聊能阿好其民
已爲建祠立像布滿郡縣皆是生祠佛殿神宮彌山
徧市豈其天主尊神無一微壇以禮拜敬事之乎世
人也皆習詐僞僞爲衆師以揚虛名供養其口胃民

父母要譽取資至于世人大父宇宙公君泯其跡而
僭其位殆哉殆哉吾意大禹適在今世非但八年在
外必其終不有家終身周巡于萬國而不忍還矣爾
欲吾三四友有子之心有兄弟之情視此爲何如時
哉中士曰以是爲亂則亂固不勝言矣時賢講學急
其表而不究其裏故表裡終于俱壞蓋未聞積惡於
內而不遽發于外者也間有儒門之人任其私智附
會二氏以論來世如丐子就乞餘飯彌綮正學不如
貴那儒者乃有歸元此論旣明人人可悟但肯用心

一思衆物之態必知物有始元非物可比聖也佛也
仙也均由人生不可謂無始元者也不爲始元則不
爲真主何能輒立世誠夫知有歸元則人道已定舍
事天又何學焉譬如一身四肢各欲自存也然忽有
刀鎗將擊其首手足自往救護雖見傷殘終不能已
尊教洞曉天主爲衆物元則凡觀惡行聞惡語凡有
逆于理違于教者若矛刃將刺天主然亟迫往護此
亦惟知有天主之在上而寧知天下有他物可尚乎
故不但不念妻子財資吾身生命猶將忘之吾輩俗

心網結彷彿慕企輶淺信從奚云捨生命弃妻子有
因上帝道德之故遷移半步遙費一芥且各惜之矣
嗟哉然吾頻領大教稱天主無所不通無所不能其
既爲世人慈父烏忍我儕久居闇晦不認本原大父
貿貿此道途曷不自降世界親引群迷俾萬國之子
者明覩真父了無二尚豈不快哉西士曰望子此問
久矣苟中華學道者常詢此理必已得之矣今吾錄
著世界治亂之由者請子服膺焉天主始制創天地
化生人物汝想當初乃卽如是亂苦者歟殊不知也

天主之才最靈其心至仁亭育人羣以迄天地萬物
豈忍置之於不治不祥者乎哉開闢初生人無病天
常是陽和常甚快樂令鳥獸萬彙順聽其命毋敢侵
害惟令人循奉上帝如是而已夫亂夫灾皆由人以
背理犯天主命人既反背天主萬物亦反背于人以
此自爲自致萬禍生焉世人之祖已敗人類性根則
爲其子孫者沿其遺累不得承性之全生而帶疵又
多相率而習醜行則有疑其性本不善非關天主所
出亦不足爲異也人所已習可謂第二性故其所爲

難分由性由習雖然性體自善不能因惡而滅所以
凡有發奮遷善轉念可成天主亦必祐之但民善性
既滅又習乎醜所以易溺于惡難建于善耳天主以
父慈恤之自古以來代使聖神繼起爲之立極逮夫
淳樸漸漓聖賢化去從欲者日衆循理者日稀於是
大發慈悲親來扶世普覺群品於一千六百有三年
前歲次庚申當漢朝哀帝元壽二年冬至後三日擇
良女爲母無所交感託胎降生名號爲耶穌耶穌即
彌辣世也躬自立訓弘化千四十三三年復昇歸

天此天主寶蹟云中士曰雖然抑何理以徵之當時
之人何以驗耶穌實爲天主非特人類也若自言耳
恐未足憑西士曰大西法稱人以聖較中國尤嚴焉
况稱天主耶夫以百里之地君之能朝諸侯得天下
雖不行一不義不殺一不辜以得天下吾西國未謂
之聖亦有超世之君却千乘以修道屏榮約處僅稱
謂廉耳矣其所謂聖者乃其勤崇天主卑謙自牧然
而其所言所爲過人皆人力所必不能及者也中士
曰何謂過人西士曰誨人以人事或已往者或今有

者非但聖而後能之有志要名者皆自強而爲焉若
以上帝及未來之事訓民傳道豈人力也歟惟天主
也以藥治病服之卽瘳學醫者能之以賞罰之公治
世而世治儒者可致茲俱以人力得之不宜以之驗
聖也若有神功絕德造化同用不用藥法醫不可醫
之病復生旣死之民如此之類人力不及必自天主
而來敝國所稱聖人者率皆若此倘有自伐其聖或
朋輩代爲誇伐或不畏天主用邪法鬼工爲異怪以
惑愚俗好自逞而恃天主之功德此爲至惡大西國

防之如水火何但弗以稱聖乎天主在世之時現跡愈多其所爲過于聖人又遠聖人所爲奇事皆假天主之力天主則何有所假哉西土上古多有聖人于幾千載前預先詳誌于經典載厥天主降生之義而指其定候迫及其時世人爭其望之而果遇焉驗其所爲與古聖所記如合符節其巡遊詔諭于民聾者命聽即聽瞽者命視即視瘖者命言即言跛者命行即行死者命生即生天地鬼神悉畏敬之莫不聽命也既符古聖所誌既又增益前經以傳大教于世傳

道之功已畢自言期候白日歸天時有四聖錄其在
世行實及其教語而貽之於列國則四方萬民群從
之而世守之自此大西諸邦教化大行焉考之中國
之史當時漢明帝嘗聞其事遣使西往求經使者半
塗誤值身毒之國取其佛經傳流中華迄今貴邦爲
所誑誘不得聞其正道大爲學術之禍豈不慘哉中
士曰稽其時則合稽其人則通稽其事則又無疑也
某願退舍沐浴而來領天主真經拜爲師入聖教之
門蓋已明知此門之外今世不得正道後世不得天

福也不知尊師許否西士曰祇因欲廣此經習從二
三英友弃家屏鄉艱勤周幾萬里而僑寓異土無悔
也誠心悅受乃吾大幸矣然沐浴止去身垢天主所
惡乃心咎耳故聖教有造門之聖水凡欲從此道先
深悔前時之罪過誠心欲遷于善而領是聖水即天
主慕愛之而盡免舊惡如孩之初生者焉吾輩之意
非爲人師惟恤世之錯回元之路而爲之一引于天
主聖教則克之皆爲同父之弟兄豈敢苟圖稱名辱
師之禮乎哉天主經文字異中國雖譯未盡而其要

已易正字但吾前所談論教端僉此道之肯綮願學
之者退而玩味于前數篇事理了已無疑則承經領
聖水入教何難之有中士曰吾身出自天主而久昧
天主之道幸先生不辭八萬里風波遠傳聖教彪炳
異同使愚聆之豁然深悟昔日之非獲惠良多且使
吾大明之世得承大父聖旨而遵守之也吾靜思之
不勝大快且不勝深悲焉吾當退于私居溫繹所授
紀而錄之以志不忘期以盡聞歸元直道所願天主
庇祐先生仁指願揚天主之教使我中國家傳人誦

播爲脩善無惡之民功德廣大又安有量歟

天土實義下卷

終